

SOCIAL BON DIA *Aruba*

Tremendo fiesta cu Datapanik na Fort Zoutman



ORANJESTAD — Michael Lampe y su agrupacion Datapanik a presente nan album nobo 'Fuente' diabierna anochi pasa cu un tremendo concierto na Fort Zoutman. Localidad inusual aki a muestra di ta perfecto pa e ocasion aki, brindando amantenan di e musica crioyo electronico di Datapanik un ambiente exclusivo y historico. De sala paden por a mira un exposicion chikito tocante e disco special aki, cual ta e di cinco album di Datapanik e di dos cu composicionnan na Papiamentu. 'Fuente' ta enfoca

mas cu tur otro produccion di Michael Lampe riba facitanan di nos cultura musical. Unda cu ya caba el a pone caha di orgel den un contexto nobo y diferente, awo a toca turno pa explora e ritmonan tipico di Aruba. Instrumental den proceso aki tabata Aruba su maestro di tambu, Vicente Ras. E homber tras di Tipico Sodo y Cuero mes a encurashá Lampe pa experimenta cu e ritmonan tipico di nos pais y pone nan den un bachi moderno. E producto final ta muestra cu esaki a logra mas cu bon, pasobra por bisa cu

'Fuente' ta e miho album di Datapanik te awo, cu tremendo canticanan manera 'Prikichi', 'Frecuencia' y 'Road'. Mester remarca tambe con e cancionnan tin un transicion for di tipico na comienso, bayendo mas y mas pa e musica electronico cu Michael Lampe ta cosechando exito cun'e internacionalmente bou number di Fellow. E anochi a cuminsa cu un warm-up set suave di Masbango pa pone e publico cu ya caba for di trempa a yega (te hasta tabatin fans na porta di Fort Zoutman prome cu

a habri nan) drenta den ambiente. Despues Nutzbeatz a cana kibra y a pone hende baila un bon rato. Despues Datapanik a subi escenario, tocando temanan di e album nobo, hunto cu exitonan conoci manera 'Palo di Coco', y 'Style Di'. E canticanan nobo a wordo bon ricibi y hopi bon toca tambe pa e conhunto cu pa añanan caba ta consisti di Egnar Rincones riba guitarra, Rene Laclé riba keyboard, drummer Derrick Huntington y Jair Britten riba percusion. Michael Lampe mes, manera semper tabata

canta y opera e parti electronico via su midi-controller. Hopi special tabata tambe ora Vicente Ras a acompaña e banda pa un par di pieza. Despues di e concierto aki, DJ Top Ranking a tuma over pa un rato despues e conocido DJ Hulandes Flexican tuma over hunto cu MC Sef. Nan a bolter Fort Zoutman, lagando un publico cansa, feliz y satisfecho y un fiesta cu a marca historia. Fuente, e album nobo di Datapanik ta obtenibel fisicamente na Bula Surf Shop y online riba iTunes. □